

Headlines

- 1 केंद्री मंत्री डॉक्टर जितेंद्र सिंह होरें अज्ज उधमपुर लोकसभा सीट लेई नामांकन दाखल कीता। इस सीट पर पैहले गेड़ तैहत 19 अप्रैल गी मतदान होगा।
- 2 चुनांऽ आयोग नै इलैक्ट्रानिक्स ते आई.टी.आई मंत्रालय गी आखेआ ऐ जे ओह व्हाट्सऐप पर विकसित भारत दे संदेसें दी दस्तयाबी गी फौरी प्रभाऽ कन्नै बंद करै।
- 3 उपराश्ट्रपति जगदीप धनखड़ होरें आखेआ ऐ जे अर्थबवस्था ते टेक्नोलाजी च भारत दा उदय कुल संसारी रमानदारी ते सद्भाव लेई इक आश्वासन ऐ।
- 4 सलाना श्री अमरनाथ जी दी जात्तरा इस बरे 29 जून थमां शुरू होने दी मेद ऐ।

<><><><><><>

Jitendra Nonimation

केंद्री मंत्री डॉक्टर जितेंद्र सिंह होरें अज्ज उमधुपर लोकसभा हल्के थमां अपनी नामजदगी आहले कागज दाखल कीते। उनें कटुआ च रिटर्निंग अफसर हुंदे अगगे अपना नामांकन दर्ज करोआया। केंद्री जल शक्ति मंत्री गजेन्द्र सिंह शेखावत होर बी इस मौके पर उंदे कन्नै हे। उधमपुर लोकसभा सीट लेई पैहले गेड़ तैहत 19 अप्रैल गी वोट पोआए जाने न। इस गेड़ तैहत 17 राज्यें ते 4 केंद्र शासित प्रदेश दिएं 102 लोकसभा सीटें पर मतदान होगा। अज्ज बीजेपी मेदवार दे तौर पर अपना नामांकन करने शा पैहले डॉक्टर सिंह होरें जम्मू च अपने आवास पर पूजा कीती। उनें 2019 दे चुनाएं च 3 लक्ख 57 ज्हार 252 वोटें कन्नै जित्त हासिल कीती ही। एहदे शा पैहले 2014 दे उनें गुलाम नबी आजाद होरें गी 60 ज्हार 976 वोटें कन्नै हराया हा।

<><><><><><>

EC-Viksit Bharat

चुनांऽ आयोग नै इलेक्ट्रानिक्स ते सूचना टेक्नोलाजी मंत्रालय गी निर्देश दित्ता ऐ जे ओह व्हाट्सऐप पर विकसित भारत दे संदेसें दी दस्तयाबी पर तुरत रोक ला। आयोग नै आखेआ ऐ जे उनेंगी इस बारै च केई शकैतां हासल होइयां न जे आम चुनाएं दी घोषणा दे बावजूद बी लोकें गी वाहट्सऐप पर एह संदेस आवै करदे न। मंत्रालय नै आयोग गी दस्सेआ ऐ जे एह चिट्ठियां आदर्श आचार संहिता दे लागू होने शा पैहले भेजियां गेइयां हियां पर नेटवर्क ते प्रणाली दिएं बंदिशों करी इंदी दस्तयाबी च मता चिर लगगी गेआ।

<><><><><><>

SC-EC Appointment

सुप्रीम कोर्ट नै मुख्क निर्वाचन आयुक्त ते निर्वाचन आयुक्तें दी नियुक्ति सरबंधी नमें कनून पर रोक लाने थवां इंकार करी दित्ता ऐ। न्यायमूर्ति संजीव खन्ना ते न्यायमूर्ति दीपांकर दत्ता दी पीठ नै आखेआ ऐ जे इस्सलै जिसलै लोकसभा चुनांऽ कोल न तां इसलै कनून पर रोक लेई नेई लाई जाई सकदी। पीठ नै आखेआ जे संविधान पीठ दे फैसले च कुसै बी जगह इस गल्ला दा जिक्र नेई हा जे चयन समिति दा सदस्य कुसी बनाया जा। इस बारै च दायर याचिका दी सुनवाई करदे होई अदालतै एह बी आखेआ ऐ जे नमें नियुक्त निर्वाचन आयुक्तें खिलाफ कोई आरोप नेई ऐ।

<><><><><><>

PM-Terrorism

प्रधानमंत्री नरेंद्र मोदी हों आखेआ ऐ जे नमां भारत आतंकवाद गी बर्दाश्त नेई करदा सगुआं एह्दे कसूरवारें गी सबक सखांदा ऐ। कल नमीं दिल्ली च इक निजी टीवी चैनल दे कन्कलेव दरान बोलदे होई मोदी हों आखेआ जे जेह्डे लोक भारत च आतंकवाद फैलाना चाहंदे हे, उंदा अज्ज नामो-निशान नेई ऐ। उनें आखेआ ज पूरी दुनिया दा एह् मन्नना ऐ जे 21मीं सदी भारत दी सदी ऐ। प्रधानमंत्री हों आखेआ जे बड्डी एजेसिएं ते अर्थ शास्त्रिएं गी भारत दे सनैह्नी भविक्ख दा पूरा भरोसा ऐ ते पूरी दुनिया एह् दिक्खै करदी ऐ जे भारत नै पिच्छले 10एं बरें च किआं बड्डी बदलाव आह्ने न।

<><><><><><>

JKNRPF

उत्तर रेलवे नै संगलदान-बनिहाल-बारामूला रूट पर ट्रेन टिकट दे कराये घटाई दित्ते न। बनिहाल स्टेशन पर तैनात रेलवे दे इक अधिकारी नै तसदीक कीती ऐ जे उधमपुर-श्रीनगर-बारामूला रेल लाइन परियोजना दी संगलदान-बनिहाल-बारामूला सैक्शन पर यात्री ट्रेन च सेकेंड क्लास सामान्य कराये गी फी बहाल करी दित्ता ऐ।

<><><><><><>

DEO-Reasi

आम चुनावं लेई कार्यक्रम जारी होई चुके दा ऐ। जम्मू पार्लिमानि हल्के लेई मतदान 26 अप्रैल 2024 गी करोआए जाने न। रियासी बी इसै पार्लिमानि हल्के च औंदी ऐ। रियासी दे जिला चुनाव अधिकारी विशेष महाजन हों रियासी च इक प्रेस कांफ्रेंस गी संबोधित कीता। जम्मू पार्लिमानि हल्के हेठ पौंदे रियासी जिले च 3 विधानसभा हल्के न जिंदे च रियासी। गुलाबगढ़ ते श्री माता वैष्णो देवी बी शामिल ऐ। इत्थे 425 मतदान केंद्र न जिंदे चा 173 रियासी च 161 गुलाबगढ़ च 91 श्री माता वैष्णो देवी च न। रियासी दे जिला चुनाव अधिकारी हों आखेआ।

<><><><><><>

ते हुन बाकी दिए खबरें कन्नै श्रुति खजूरिया।

VP

उपराष्ट्रपति जगदीप धनखड़ हों आखेआ ऐ जे अर्थबवस्था ते टेक्नोलाजी च भारत दा उदय कुल संसारी रमानदारी ते सद्भाव लेई इक आश्वासन ऐ। उनें इब्बी आखेआ जे भारत वैश्विक शांति, स्थिरता ते सद्भाव बनाई रक्खने लेई इक्के नेयी विचार धारा आह्ले मुलखें गी शामिल करने लेई बचनबद्ध ऐ। श्री धनखड़ हों अज्ज नमीं दिल्ली च अपने संबोधन दरान आखेआ जे भारत हून इक कमजोर मुलख नेई ऐ, अज्ज एह् तेज रफ्तार कन्नै तरक्की करै करदा ऐ ते इसी रोकन मुमकिन नेई ऐ। उपराष्ट्रपति हों आखेआ जे लगातार बधै करदी अर्थ व्यवस्था, असरदार कूटनीति ते बधदी ताकत दे दम उप्पर अगगे बधै करदे भारत बक्खी अज्ज पूरी दुनिया मेदें भरोची नजर कन्नै दिक्खा करदी ऐ जे भारत गै आलमी सतह पर रमानदारी जकीनी बनाई सकदा ऐ। उनें इन-स्टेप कोर्स गी इस दिशा च बडी महत्वै आली पैहलकदमी करार दित्ता।

<><><><><><>

Amarnath-Yatra

श्री अमरनाथ जी दी सलाना यात्रा इस बरे 29 जून थवां होने दी मेद ऐ। अधिकारिक सूत्रें मुजब उप-राज्यपाल मनोज सिन्हा, जेडे श्री अमरनाथ श्राइन बोर्ड दे अध्यक्ष बी हैन, हों राजभवन जम्मू च इक बैठक लाई ते यात्रा दे इंतजामें ते तयारिएं दा जायजा लैता। 52 दिन तगर चलने आह्ली एह् यात्रा 19 अगस्त गी रक्खड़-पुन्नेया आले दिन सम्पन्न होई जाग। अधिकारी मुजब यात्रा लेई पंजीकरण अगले म्हीने दे अखीरै तगर शुरू होई जाग।

अधिकारी मुजब जियां गै यात्रा लेई घोषणा होग तां फीह एहदे लेई तयारियां युद्ध स्तर पर शुरू होई जाग। यात्रा दौरान लाइव आरती दस्सी जाग जेड़ी पैहली जुलाई थवां शुरू होई जाग। 2023 च 4 लख 50 जहार श्रद्धालुएं श्री अमरनाथ जी दी जात्तरा कीती ही।

<><><><><><>

IFD-Reasi

जंगलात मैहकमे नै रियासी च स्मृति वन दे राहें अंतरराष्ट्री जंगलात ध्याड़ा मनाया। रियासी दे जंगलात रेंज अफसर नसीर मलिक नै लोकें गी अपील कीती ऐ जे ओह भविष्य दिएं पीढ़िं गी इक बेहतर पर्यावरण उपलब्ध करोआने लेई मते शा मते रूख-बूहटे लान। जंगलें सरबंधी अंतरराष्ट्री ध्याड़ा हर बरे 21 मार्च गी मनाया जंदा ऐ। इस बारै स्हाड़े जिला संवाददाता कन्नै गल्ल करदे होई रियासी दे जंगलात रेंज अफसर नसीर मलिक होरें आखेआ।

<><><><><><>

Tulip-Garden

उप-राज्यपाल मनोज सिन्हा होरें सनासर च टूलिप गार्डन दा उद्घाटन कीता। एहदा मकसद जम्मू खित्ते च सैलसफा गी बढ़ावा देना ऐ। इस बरे टूलिप गार्डन सैलानिं लेई अप्रैल दे पैहले हफ्ते खुल्ली जाग। एह गार्डन 40 कनाल थवां बढ़ जमीन पर फैले दा ऐ। इत्थे फुल्लें दी काशत सरबंधी मैहकमे नै 25 बख-बख चाल्ली दे 2 लख 75 जहार टूलिप लाए दे ना। स्हाड़े रामबन आहले संवाददाता कन्नै गल्ल करदे होई फुल्लें दी काशत सरबंधी मैहकमे दे अधिकारी अर्जुन सिंह परिहार होरें आखेआ।

<><><><><><>

NC-Investiture Ceremony

सेना दी उत्तरी कमान आस्सेआ इक आलंकरण समारोह उत्तर प्रदेश दे प्रयागराज सैन्य स्टेशन च आयोजित होआ जित्थे सैनिकें गी उंदी बहादुरी ते टकोदी कारकरदगी लेई सम्मानित कीता। एह कार्यक्रम रेड इगल डिविजन दे बैनर हेठ आयोजित होगा। सैनिकें गी उंदी बेमिसाल बहादुरी ड्यूटी दौरान टकोहदी ते असाधारण कारकरदगी दस्सने लेई सम्मानित कीता गेआ। भारती सेना दे उत्तरी कमान इक प्रमुख कमान ऐ जेड़ी कारवाइएं दे स्हाबै सब्बनें थवां बढ़ सक्रिय रौहंदी ऐ। उत्तरी कमान प्रमुख जी.ओ.सी लेफ्टिनेंट जनरल एम.वी सुचेंद्रा कुमार होरें सैनिकें ते अफसरें गी सम्मानित कीता। जी.ओ.सी होरें जेत्तुएं गी बदाई दित्ती।

<><><><><><>